

**Kalaallit nunaanni suliffeqarfinnut uuliasiornermi aatsitassarsiornermilu ingerlatsinermi teknikkikkut piumasaqaataasut anguneqarsinnaaqullugit nunaqavissut suliffeqarfiutaasa piginnaasaat periarfissaallu pitsannngorsarniarlugit qanoq suliniuteqartoqarsinnaanersoq Naalakkersuisut misissuititsinermik peqquneqarnissaannik Inatsisartut aalajangiiffigisassaattut siunnersuut.**

### **Akissuteqaat**

(Inuussutissarsiornermut Aatsitassanullu Naalakkersuisoq)

### **Aappassaanneerpeqarnera**

Matumuuna Inatsisartuni Inuussutissarsiornermut Ataatsimiititaliami ilaasortat, siunnersuutip siullermeerneqareernerata kingorna Ataatsimiititaliami suliarinninnerannut qutsavigissavakka. IBA-mut aatsitassarsiorfiutileqatigiiffinnut isumaqatiginninniarnernut tunngatillugu, aatsitassarsiornermik suliniutinut malittaasut pitsaasumik sunniuteqarnerisigut inuiaqatigiit kalaallit iluanaarutissaat sapinngisamik annertunerpaamik annertusineqartussanngorlugit, suliffeqarfiit qanoq periusissatigut iliuseqartassanersut pillugu ilisimasat, paasititsiniaalluni sulianut ingerlaavartunut atatillugu ilanngunneqartariaqaraluartut pillugu amerlanerussuteqartut inassuteqaataat Naalakkersuisut ilalerpaat. Taamatuttaaq suliffeqarfiit aatsitassarsiorlut sanaartorerup immikkoortuani suliffeqarfinnik najukkameersunik inerisaaqataasarnissaat aammalu taakkua ataatsimut isigalugu aatsitassarsiornermut suliassaqarfimmi ingerlatanut atatillugu suliassanut neqerooruteqartarnissamut piukkunnarsarneqarnissaannut peqataassasut pillugu oqaaseqartartumit saqqummiussamut qujavunga.

Aatsitassarsiornermi ingerlatanut pilersuisunnngornissamut suliffeqarfiit kalaallinit pigineqartut piginnaasaat periarfissaallu pitsannngorsarniarlugit suliniutinik Naalakkersuisut aallartitsererput. Tamatuma saniatigut IBA-mut isumaqatiginninniarnernut suliniarneq malinnaaffiginiarlugu alloriarnissat pisariaqartut Naalakkersuisut ingerlaavartumik isumaginiarpaat, taamaalilluni ilisimasamik nuussisarnissap, sungiusartunut ilinniartunullu inissat kiisalu suliffeqarfiit kalaallinit pigineqartut peqataatinneqarnissaasa, niuerneramik tunngaveqartuni atugassarititaasuni piumasaqaatinilu suliassat neqeroortitsivigineqarneranni piumasarineqartartuni eqqarsaatigineqarnerisigut, isumaqatiginninniarnerni qulequttani qitiutinneqartassallutik. Tassani aamma pineqarput sulinermut isumaqatigiissutit atuuttut malinneqarnissaat kiisalu sulinermi avatangiisinut pitsaassusissanullu piumasaqaatit atuuttut kiisalu najukkami attaveqarneq toqqaannartumik aatsitassarsiorfinnik ingerlatsinerup ineriartortinneqarneranut attuumassuteqanngitsoq.

Naalakkersuisut suliffeqarfinnik kalaallinit pigineqartunik piginnaanngorsaallutik ingerlatsillualereermata, suliniarnerlu taanna ingerlaannarmat aammalu aatsitassarsiorfiutileqatigiiffinnut IBA-mut isumaqatiginninniarnerni annertusarneqarluni, Naalakkersuisut inassutigaa siunnersuut akuerineqassasoq.